

淵鑑類函

第四函
玉冊

淵鑑類函卷三百八

人部六十七

遊覽
恤孤

懷舊

遊覽五下

原賦後漢班彪遊居賦夫何事於冀州聊託公以遊居
歷九土而觀風亦哲人之所虞遂發軔於京洛臨孟津
而北厲想尚父之威虞號蒼兕而明誓既中流而歎息
美周武之知性謀人神以動作享鳥魚之瑞命瞻淇澳
之園林善綠竹之猗猗望常山之峩峩登北岳而高遊
嘉孝武之乾乾親飾躬於伯姬建封禪於岱宗瘞元玉
於北丘徧五岳與四瀆觀滄海以周流鄙臣恨不及事

陪後乘之下僚今匹馬之獨征豈斯樂之足娛且休精
於敝邑聊卒歲以須臾 魏曹植節遊賦覽宮宇之顯

麗實大人之攸居建三臺於前處飄飛陛以凌虛連雲
閣以遠徑營觀榭於城隅亢高軒以迴眺緣雲霓而結
䟽仰西岳之崧岑臨漳滏之清渠觀靡靡而無終何眇
眇而難殊亮靈后之所處非吾人之所廬於是仲春之
月百卉叢生萋萋藹藹翠葉朱莖竹林青蔥珍果含榮
凱風發而時鳥謹微波動而水蟲鳴感氣運之和順樂
時澤之有成遂乃浮素蓋御驂騑命友生攜同儔誦風
人之所歎遂駕言而出遊步北園而馳騫庶翱翔以解

憂望洪池之滉漾遂降集乎輕舟沈浮蟻於金罍行觴
爵於好仇絲竹發而響厲悲風激於中流且容與以盡
觀聊永日而忘愁嗟羲和之奮策怨曜靈之無光念人
生之不永若春日之微霜諒遺名之可紀信天命之無
常愈志蕩以淫遊非經國之大綱罷曲宴而旋服遂言
歸於舊房 又感節賦攜友生而遊觀盡賓主之所求
登高壙以永望冀消日以忘憂欣陽春之潛潤樂時澤
之惠休望候雁之翔集想元鳥之來遊嗟征夫之長勤
雖處逸而懷愁懼天河之一迴沒我身乎長流豈吾鄉
之足顧戀祖宗之靈丘惟人生之忽過若鑿石之未燿

慕牛山之哀泣懼平仲之我笑折若華之翳日庶朱光
之長焰願寄軀於飛蓬乘陽風而遠飄亮吾志之不從
乃拊心以歎息青雲鬱以西翔飛鳥翻而上匿欲縱體
而從之哀予身之無翼大風隱其四起揚黃塵之冥冥
野獸驚以求羣草木紛其揚英見遊魚之泔灑感流波
之悲聲內紆曲而潛結心怛惕以中驚匪榮德之累身
恐年命之早零慕歸全之明義庶不忝乎所生 楊修
節遊賦曰爾乃息偃暇豫攜手同征遊乎北園以娛以
逞欽太皞之統氣樂乾坤之布靈誕煙煴之純和百卉
挺而滋生谷風習以順時撓百物而有成行中林以仿

惶玩奇樹之抽英或素華而雪朗或紅彩而發頰綠葉
白蒂紫柯朱莖楊柳依依鍾龍蔚青紛灼灼以舒葩芳
馥馥以播馨嗟珍果之叢生每異類而絕形稟沖和以
固植信能實而先榮於是迴旋詳觀目周意倦御於方
舟載笑載言仰沂涼風俯濯纖腕極歡欣以從容乃升
車而來反

增

梁沈約郊居賦爾乃傍窮野抵荒郊編

霜莢葺寒茅構棲噪之所集築町疇之所交因犯檐而
刊樹由妨基而剪巢決渟渚之汀澹塞井甃之淪坳藝
芳枳於北渠樹修楊於南浦遷甕牖於蘭室同肩牆於
華堵織宿楚以成門籍外扉而爲戶旣取陰於庭樾又

因籬於芳杜開閣室以遠臨闢高軒而旁觀漸沼沚於
霄垂周塋陌於堂下若乃園宅殊制田圃異區李衡則
橘樹千林石崇則雜果萬株並豪情之所侈非儉志之
所娛欲令紛披蓊鬱吐綠攢朱羅窗映戶接霄承隅開
丹房以四照舒翠葉而九衢抽紅英於紫蒂銜素蕊於
青跗訪往途之軫跡觀先識之情僞每誅空而索有皆
指難以爲易不自己而求足並尤物以興累亦昔士之
所逃而今予之所避也臨異維而騁目即堆塚而流眄
雖茲山之培塿乃文靖之所宴驅四牡之低昂響繁筵
之清轉羅方食而綺錯窮海陸而兼薦奚一權之足偉

委千金其如線試撫臆而爲言豈斯風之可扇將通人之遠旨非庸情之所見聊遷情而徙睇識方阜之歸津帶修汀於桂渚肇舉插於強秦路縈吳而歛越塗被海而通閩懷三島以長念伊故鄉之可珍實愆期於晚歲非失步於方春何東川之瀾瀾獨流睇於吾人謬參賢於昔代亟從遊於茲所侍綵旄而齊轡陪龍舟而遵渚或列席而賦詩或班觴而宴語總惟一朝冥漠西陵忽其蔥楚望商飈而永歎每樂愷於斯觀始則鐘石鏘鉉終以魚龍瀾漫或升降有序或浮白無算貴則丙魏蕭曹親則梁武周旦莫不共霜霧而歇滅與風雲而消散

睇東嶽以流目心悽惆而不怡蓋昔儲之舊苑實博望
之餘基修林則表以桂樹列草則冠以芳芝風臺累翼
月榭重栴千櫨捷業百拱相持阜輶林駕蘭榭水嬉踰
三齡而事往忽二紀以歷茲咸遺漫以蕩滌非古今之
異時回余眸於艮域覲高館於茲嶺雖混成以無跡實
遺訓之可秉始餐霞而吐霧終凌虛而倒景駕雌蜺之
連蜺泛天光之悠永指咸池而一息望瑤臺而高騁匪
爽言以自誇冀神方之可請惟鍾巖之隱鬱表皇都而
作峻蓋望秩之所宗含風雲而吐潤其爲狀也則巍峩
崇峯喬枝拂日巖疑岩崑隆石堆星岑崑嶂屹或均或

平盤堅枕卧詭狀殊形孤磴橫插洞穴斜經千丈萬仞
三襲九成亘繞州邑款跨郊坳素煙晚帶白霧晨縈近
循則一巖異色遠望則百嶺俱青晚樹開花初英落蕊
或異林而分丹青乍因風而雜紅紫蓮夜發紅荷曉
舒輕風微動其芳襲余風騷屑於園樹月籠連於池竹
蔓長柯於簷桂發黃花於庭菊水懸壑而帶坻雪縈松
而被野鴨屯飛而不散雁高翔而欲下並時物之可懷
雖外來而非假寔情性之所留滯亦志之而不能捨也
傷余情之頽暮罹憂患其相溢悲異軫而同歸歡殊方
而並失時復託情魚鳥歸閑蓬蓽旁闕吳娃前無趙瑟

以斯終老於焉消日惟以天地之恩不報書事之官靡
述徒重於高門之地不載於良史之筆長太息其何言
羌愧心之非一

唐王勃遊廟山賦陟彼山阿積石峩
峩亭臯千里傷如之何啟松崖之密蔭攀桂岳之崇柯
隔浮埃於地絡披顥氣於天羅爾其綠巖分徑蒼岑對
室茵軒丹紉芝塲翠密俯泉石之清泠臨風颺之瑟颺
仰紺臺而攜手望元都而容膝躡霞岡於玉砌步雲岳
於金壇懷妙童於真女想青螭及碧鸞情恍恍而將逸
心迴迴而未安見丹房之晚晦知紫洞之宵寒旣而霧
昏千障煙浮四野恨流俗之情多痛飛仙之術寡驅逸

思於方外踞高情於天下使蓬瀛可得而宅焉何必懷
於此都也亂曰已矣哉吾誰欺林壑逢地煙霞失時託
宇宙兮無日俟鸞虬兮末期他鄉山水祇令人悲李
嶠楚望賦曰眇乎忽然高山之顛露團團而濕草風烈
烈而鳴泉對蒼茫之寒日聽蕭索之悲蟬廓獨處而無
晤吾凝睇乎八埏於是繁懷載紆積慮未豁生遠情於
地表起遙恨於天末霜盡川長雲平野闊恨遊襟之浩
蕩憤羈怨之忉怛若乃平原杳兮千里春山花香兮萬
里新迷故鄉之處所滅愛舊之聲塵願寄言而靡託思
假翼而無因徒極睇而盡思終天性而傷神或復天高

朔漠氣冷河關漢塞鴻度吳宮燕還對落葉之驅影怨
浮雲之慘顏爾乃永眺無見端居不聊愴歸軒之寂寂
傷遠客之悠悠月臨城曉風送邊秋唳鶴聞兮烟不寐
凝笳動兮此夜愁及夫寒野蕭條空山寂寥目鄢郢而
途渺指邯鄲而路遙傷永離兮浦曲訣遠送兮河橋眺
平蕪之漫漫瞻遠樹之迢迢伫然直視嗌矣魂銷形將
槁木同植心與飛蓬共飄至如隴上從軍漢陽謫戍插
羽朝急要鞭夜赴黯黯寒雲蒼蒼關樹甘岑影於異域
斂回首於歸路魂逝兮邑里目斷兮煙霧步將前而復
留望欲罷而還顧覩驚塵之歛起見征羽之將度泉石

愴而增咽行旅悲而失措亦有擣衣思婦織錦佳人看
粉黛兮無色視桃李兮非春君去兮還無期妾心兮私
自悲高臺四望眇無極天涯一去何盡時天涯兮綿綿
問道路兮將幾千朝朝暮暮綺窗前長懷此恨終永年
若夫羈旅失職之人放逐流離之客羌抱恨而誰訴塊
緘愁而不釋於是窮澤際天滄流拂漢屬榮悴兮時改
遇炎涼兮節換莫不瞻草木而孤絕向風烟而永歎故
夫望之爲體也使人慘悽伊鬱惆悵不平興廢思慮震
蕩心靈罔兮若有求而不致也悵乎若有待而不至也
悠悠揚揚似出天壤而涉雲莊迢迢巡巡若失其守而

忘其眞羣感方興衆念始并旣情招而思引亦目受而

心傾

劉禹錫楚望賦曰櫺軒之外羣山巖從岡陵靡

陀勢若相拱出雲見怪窈蔚森聳夕露朝霞望如飛動
簷廡之下大江瀕洞支流合輸泄入雲夢義和望舒出
沒兩涯涵泳之族聲取歔呀秋水灌盈漩石飄沙流枿
軒昂舞於盤渦逮及收潦澹如醪醑白石磷磷倒影羅
生蘋末風起有文無聲悠遠煙綿與空蒼然湘沅之春
先令而行臆月寒盡溫風發榮土膏如濡言鳥嚶嚶三
星曙其曉中植物颺以飄英雲歸高唐草蔽洞庭目與
天盡神將化并圓方相函遊氣杳冥熙熙藹藹藻飾羣

形栴樹同丘積空凝青環洲曲塘含景曜明恢台之氣
發於春季涉夏如鑠逮秋愈熾土山焦熬止水漫沸翔
禽趾隨呀喙垂翅曦赫歆蒸陽極召陰二儀交精下上
相歆雲興天際歟若車蓋凝臚未瞬彌漫霏霽驚雷若
火喬木糜碎殷地熱空萬夫皆廢懸雷綆縋日中見沫
移晷而收野無完塊少陰之中景物澄鮮丹葉星房燭
耀川原夕月旣望曜於丹泉上鏡下冰湔塵濯煙宿麗
潛芒獨行高躔明星方揚斜漢西懸璿柄如隋半沈層
瀾雞啁哳而晨鳴今日荏苒以騰晶動植瞭今已分山
川鬱乎不平復人寰之誼卑洵浩浩以營營追向時之

景光不可驟得以再更意華胥之夢還猶彷彿而馳精
日次於房天未降霜百卉猶澤水泉收脉故道脰削衍
爲廣斥水禽嬉戲引吭伸翮紛驚鳴而決起拾綵翠於
砂礫維時北風振槁揚埃蕭條邊聲與雁俱來寒氛委
積萬竅交激楚雲改容飛雨凝滴灑林遽響淅瀝梢槭
我處層軒日星廻還閱天數而視民風百態變見乎其
間非耳剽以臆說今固幽求而縱觀觀物之餘遂觀我
生何廣覆與厚載豈有形而無情高莫高兮九闔遠莫
遠兮故園丹有檝兮車有轄江山坐兮不可越又安知
其所如悅臨高以觀物又望賦邈不語兮臨風境自